

## GARIS PANDUAN PERBOMOHAN MENURUT ISLAM

Muzakarah Jawatankuasa Fatwa MKI Kali Ke-46

22 April 1999

### TUJUAN

Garis panduan ini disediakan untuk dijadikan panduan kepada umat Islam khususnya mereka yang terlibat dengan amalan perbomohan tradisional supaya terhindar dari amalan yang bertentangan dengan aqidah, syariat, dan akhlak Islam yang sebenar.

### PENDAHULUAN

1. Islam amat menitikberatkan soal-soal aqidah, syariah, dan akhlak. Segala amalan dan kepercayaan yang tidak berdasarkan kepada sumber-sumber asal Al-Quran, Hadis, Ijma' dan Qias adalah ditolak. Dalam urusan perubatan kepada pesakit, satu perkara harus di ingat oleh semua pihak, bahawa hanya Allah sahaja berkuasa mutlak menentukan sesuatu dan menjadikannya, lebih-lebih lagi sakit dan sembuh adalah hakNya, manusia hanya disuruh berusaha dan beriktiar. Dalam hubungan ini umat Islam di negara ini ada kepercayaan-kepercayaan dan amalan-amalan tradisi tertentu dan sedikit sebanyak ada hubungkaitnya dengan pengaruh dari fahaman anamisme, dinamisme, Hindu dan lain-lain.
2. Garis panduan ini perlu dijadikan asas dan panduan supaya dapat mengelakkan diri dari penyelewengan dalam akidah dan syariat Islam. Allah s.w.t berfirman dalam Surah Yunus, ayat 106:

وَلَا تَدْعُ مِنْ دُونِ اللَّهِ مَا لَا يَنْفَعُكَ وَلَا يَضُرُّكَ فَإِنَّكَ إِذَا مَنَّ أَنْظَلَ لَيْسَ بِهِ

*Maksudnya: "Dan janganlah engkau (wahai Muhammad) menyembah atau memuja yang lain dari Allah, yang tidak dapat mendatangkan manfa'at kepadamu dan juga tidak dapat mendatangkan mudarat kepadamu. Oleh itu, sekiranya engkau mengerjakan yang demikian,*

*maka pada saat itu menjadilah engkau dari orang-orang yang berlaku zalim (terhadap diri sendiri dengan perbuatan syirik itu)."*

3. Di samping itu Islam tidak membenarkan umatnya menggunakan sihir, kerana Rasulullah s.a.w bersabda yang bermaksud:

عَنْ أَبِي هُرَيْرَةَ عَنِ النَّبِيِّ صَلَّى اللَّهُ عَلَيْهِ وَسَلَّمَ قَالَ أَجْتَبْرُوا السَّبْعَ الْمُؤْمِنَاتِ  
قَالُوا يَا رَسُولَ اللَّهِ وَمَا مِنْنَهُنَّ قَالَ الشَّرِكُ بِاللَّهِ وَالْتَّحْرِيرُ وَقَتْلُ النَّفْسِ الَّتِي حَرَمَ اللَّهُ  
إِلَّا لِحَقٍّ وَأَكْلُ الرِّبَا وَأَكْلُ مَالِ الْيَتَامَةِ وَالْوَالِدَيْهِ يَنْهَا الرَّحْمَنُ وَقَذْفُ الْخَصَّاتِ  
الْمُؤْمِنَاتِ النَّافِذَاتِ

*"Jauhilah tujuh perkara yang merosakkan. Para sahabat bertanya, "apakah tujuh perkara itu?" Baginda menjawab: "menyengutukan Allah, sihir, membunuh orang tanpa hak, makan riba, makan harta anak yatim, lari dari medan perang dan menuduh perempuan baik melakukan maksiat terkutuk".*

*(Hadis riwayat Bukhari. Kitab saih Bukhari,  
Kitabul Hudud, Bab 44, m.s. 33)*

4. Selain itu Rasulullah s.a.w bersabda yang bermaksud:

قَالَ أَبُو الرُّثَيْبِ : وَسَمِعْتُ جَابِرَ بْنَ عَبْدِ اللَّهِ يَقُولُ : لَدَغَتْ رَجُلًا مِنِّي  
عَقْرَبٌ . وَنَحْنُ جُلُوسٌ مَعَ رَسُولِ اللَّهِ صَلَّى اللَّهُ عَلَيْهِ وَسَلَّمَ . فَقَالَ رَجُلٌ : يَا رَسُولَ اللَّهِ أَ  
أَرْقَى ؟ قَالَ : مَنِ اسْتَطَاعَ مِثْكُمْ أَنْ يَئْنَعَ أَخَاهُ فَلَيَفْعَلْ ॥

*"Berkata abu zubair, aku dengar Zabil Abdullah berkata, seorang lelaki daripada kami telah disengat kala jengking. Ketika itu kami duduk bersama Rasulullah s.a.w. maka berkata seorang lelaki wahai Rasulullah! Bolehkah aku jampi? Baginda bersabda "barang siapa yang mampu diantara kamu untuk memberi manfaat kepada saudaranya maka hendaklah dilakukan".*

*(hadis riwayat Imam Muslim-Bab Istihbab  
al-Ruwyah min Al-Ain Wa An Namlah Wal Hummah,  
Wal An Naqarah, Jld. 9, muka surat 5905)*

5. Dalam sejarah Islam memang wujud cara perubatan tertentu seperti mana yang dilaksana oleh Rasulullah s.a.w. dan para sahabat. Selain daripada cara pengubatan biasa, mereka juga telah menggunakan doa-doа, khusus bagi mengubati penyakit-penyakit seperti mana yang terdapat di dalam buku-buku perubatan ini. Walau bagaimanapun mereka tidak menggunakan kaedah atau kepercayaan seperti yang difahami oleh sesetengah pihak yang tidak dikehendaki syarak seperti dengan memanggil roh datuk nenek, roh wali-wali, syeikh-syeikh dan khadam-khadam tertentu.

Oleh itu kita dibolehkan untuk melakukan jampi kepada diri, kaum keluarga atau orang lain yang ditimpa kesusahan, kerana jampi merupakan doa perlindungan berdasarkan syarak. Jika lain dari itu perlu dilihat adakah ia berlawanan dengan syarak atau tidak.

## TAKRIF

1. **Bomoh**, Menurut Kamus Dewan (DBP, KL1989) ialah tabib kampung (yang mengubati orang sakit dengan menggunakan tradisional atau cara kampung dan jampi-jampi.)
2. **Dukun** ialah orang yang mengubati orang sakit atau memberi ubat cara kampung atau tradisional (dengan membaca jampi serapah dan sebagainya){m.s.297}
3. **Pawang** ialah:
  - i. Orang yang mempunyai kebolehan yang istimewa yang boleh melakukan sesuatu (biasanya dengan menggunakan kuasa ghaib)
  - ii. Orang yang pandai mengubati orang sakit dan lain-lain (dengan menggunakan jampi mentera dan lain-lain) {920 Kamus Dewan 1989 DBP}
4. **Jampi** dalam bahasa Melayu ialah perlindungan yang dijampi kepada seseorang yang mengidap sakit seperti demam, pening dan lain-lain penyakit. Dalam bahasa arab, jampi dikenali dengan al-Ruqa atau al-Ruqyah.

5. Garis panduan bomoh ini mengandungi perkara-perkara berikut:

- i. Asal Usul Perbomohan
- ii. Matlamat Perbomohan
- iii. Syarat-syarat Perbomohan
- iv. Mengenai Bomoh
- v. Ikrar Dan Sumpah
- vi. Pantang Larang
- vii. Adab Semasa Perbomohan
- viii. Pengalaman Perbomohan
- ix. Bayaran Perkhidmatan/Pengeras
- x. Pengijazahan
- xi. Tertakluk Kepada Undang-Undang Negara

## **GARIS PANDUAN PERBOMOHAN**

### **1. Asal Usul Perbomohan**

Setiap individu atau kumpulan tidak boleh mendakwa bahawa perbomohnya bersumber dari Nabi Muhammad s.a.w., para ambiya' atau diambil dari Al-Quran dan Hadis atau berasal dari amalan para sahabat Nabi s.a.w. atau lain-lain jika tidak ada alasan yang kukuh berdasarkan nas Al-Quran dan al-Hadis.

### **2. Matlamat Perbomohan**

- i. Matlamat perbomohan matlamat yang baik seperti untuk kesihatan tubuh badan, kerukunan hidup bermasyarakat dan berumahtangga.
- ii. Dilarang sama sekali untuk membala dendam, membuat anaya, menakut-nakutkan, mengugut orang lain dan lain-lain.

### **3. Syarat-Syarat Perbomohan**

Bagi mempastikan perbomohan tidak bercanggah dengan ajaran Islam perkara berikut hendaklah dikenalpasti:

- i. Tidak menggunakan bentuk amalan sihir, ilmu hitam, tilik tenung, tukang nujum, ramalan tapak tangan dan silap mata.
- ii. Tidak boleh mengaitkan sesuatu pengeras dengan sesuatu akibat.
- iii. Tidak boleh percaya kepada sial dan mudharat yang menimpa seseorang atau diri.
- iv. Tidak boleh melakukan perkara-perkara yang berunsur syirik seperti semah pantai, sembelihan binatang, buang ancak dan lain-lain.
- v. Tidak boleh menyembelih binatang untuk sesuatu tujuan yang bukan syar'i.
- vi. Tidak boleh melakukan perbomohan atau bacaan tertentu yang menggunakan unsur-unsur meminta izin atau bantuan dari kuasa-kuasa makluk "ghaib" dalam acara perbomohan.
- vii. Tidak boleh menyajikan makanan untuk menjamu penunggu.
- viii. Tidak boleh mentaati bomoh atau seseorang pada perkara-perkara yang jelas bercanggah dengan akidah dan syariat Islam.
- ix. Menolak sebarang syarat yang diberikan yang bertentangan dengan akidah, syariah dan akhlak Islam.

#### **4. Mengenai bomoh**

- i. Bomoh hendaklah beragama Islam aqil dan baligh serta mengetahui apa yang diucapkannya.
- ii. Tidak melakukan perkara-perkara yang boleh membawa syirik, sama ada melalui iktikad, perkataan atau perbuatan.
- iii. Tidak meninggalkan ibadat-ibadat wajib dalam Islam seperti sembahyang fardu, puasa dan zakat.
- iv. Tidak melakukan maksiat, jenayah dan yang bertentangan dengan undang-undang negara.
- v. Tidak memecahbelahkan masyarakat dan keluarga.
- vi. Tidak mentafsir ajaran agama Islam mengikut hawa nafsu.
- vii. Tidak memasukkan atau menggunakan unsur-unsur yang bercanggah dengan Islam seperti sihir, ilmu hitam dan menurun kerana pengamalnya termasuk dalam kategori penyeru iblis dan syaitan dengan ucapan-ucapan yang tidak wajar atau yang boleh membawa kepada kufur dan syirik.
- viii. Tidak boleh bersahabat dengan makluk ghaib seperti jin dengan tujuan mendapat pertolongan dalam perkara yang di tegah oleh

syarak walaupun dikatakan dengan jin Islam kerana kita tidak tahu samada betuk Islam atau tidak.

- ix. Tidak boleh meminta pertolongan jin dalam rawatan perubatan sehingga membawa kepada syirik kerana dibimbangi wujud unsur menafikan kudrat Allah.
- x. Tidak harus meminta pertolongan jin untuk mencari kekuatan dan kekuatan kerana dibimbangi wujud keyakinan bahawa makhluk-makhluk ini mempunyai kuasa yang sama dengan Allah semata-mata.
- xi. Tidak harus meminta dan menggunakan khidmat jin untuk ilmu sihir atau nujum atau ‘menurun’ kerana ia termasuk dalam amalan syirik atau dilarang oleh Allah dan boleh merosakkan aqidah orang yang terlibat dengannya.
- xii. Tidak boleh melakukan ramalan tentang baik atau buruk pada masa akan datang dan tidak harus menyatakan pada ramalan yang telah lalu dengan cara tebakan, tenung dan lain-lain.
- xiii. Hendaklah mengiklaskan hati dalam amalan, semata-mata mencari keredhaan Allah s.w.t.
- xiv. Hendaklah sentiasa bertaqwa kepada Allah. Kerana Allah sahaja yang memberi kebaikan dan pertolongan.

## 5. Ikrar Sumpah Dan Taat Setia

- i. Sumpah tidak dibolehkan semasa perbomohan, hanya ikrar saja boleh digunakan mengikut kesesuaian.
- ii. Pengamal bomoh tidak boleh taat secara membuta tuli kapada bomoh. Mereka boleh mengikut suruhan bomoh tertentu selama tidak bercanggah dengan hukum syarak.
- iii. Bacaan-bacaan, amalan dan ikrar yang terdapat di dalam pengakuan ikrar hendaklah tidak mengandungi perkara-perkara yang bercanggah dengan aqidah dan syariat Islam seperti memuja dewa, atau nama berhala.
- iv. Di dalam upacara ikrar sama ada dari segi fizikal atau mental hendaklah tidak mempunyai unsur-unsur yang mensyirikkan Allah dan menjatuhkan maruah seseorang sebagai orang Islam.

## **6. Pantang larang**

- i. Tidak boleh dikaitkan dengan pantang larang sesuatu unsur pemujaan, meminta izin, perlindungan atau bantuan daripada makhluk-makhluk ghaib seperti hantu, jin, penunggu atau orang halus dan sebagainya.
- ii. Tidak boleh memenuhi kehendak pantang larang bomoh sehingga melakukan perkara-perkara yang ditegah di dalam Islam seperti meninggalkan tanggungjawab sebagai suami dan isteri, membuka aurat bersunnyian antara pesakit yang lain jantina dengan bomoh sahaja dan sebagainya.
- iii. Perkara-perkara yang harus dan halal dalam syariat Islam tidak boleh dihukumkan haram atau sebaliknya.
- iv. Tidak menurut apa-apa pendapat bomoh yang bertentangan dengan apa juga perkara yang berhubung dengan aqidah, syariah dan akhlaq Islam.

## **7. Adab Semasa Perbomohan**

- i. Tidak mendakwa perkara-perkara yang ghaib.
- ii. Bomoh tidak boleh takbur dan tidak boleh menganggap orang lemah dan lekeh.
- iii. Bomoh hendaklah melarang pesakitnya memuja, mengagung dan taksub kepadanya.
- iv. Bomoh hendaklah mengikut adap sopan dan tatatertib Islam ketika menolong seseorang samada besendirian atau bersama pesakit.
- v. Hendaklah menjaga kesopanan susila adab sebagai seorang Islam.

## **8. Pengalaman Bomoh**

- i. Perbomohan tidak boleh dikaitkan dengan zat Allah dan sifat-sifatNya atau merupakan maksud disebalik kalimah atau nama-nama Allah atau sifat-sifatNya seperti menyatakan ilmu bomoh itu diterima terus dari Allah atau kudratnya adalah kudrat Allah, atau melalui mimpi berjumpa wali, malaikat atau lainnya.
- ii. Pengalaman bomoh tidak boleh diertikan sebagai maksud yang tersirat daripada diri atau jasad dan roh Rasulullah s.a.w., para malaikat, nabi-nabi dan orang solleh seperti nur Muhammad

- menjelma ke dalam diri, dan sebagainya.
- iii. Tidak boleh menuja dan memperhambakan diri kepada sesuatu kuasa atau peribadi yang dipercayai boleh mendatangkan nasib baik atau buruk kepada seseorang seperti wali, sheikh, rija'lul ghaib, roh datuk nenek, sahabat, hantu, dewa, keramat, kubur, keris, busut, kayu, cincin, kain kuning atau puteh dan lain-lain.
  - iv. Tidak boleh menggunakan tangkal dan azimat yang mengandungi rajah-rajah atau tulisan-tulisan yang tidak difahami seperti objek-objek tertentu dan bercampuraduk dengan ayat Al-Quran dan jangan menganggapkan tangkal mempunyai kuasa.

## 9. Penggunaan jampi dibolehkan dan digunakan dengan syarat

- i. Menggunakan ayat Al-Quran;
- ii. Menggunakan bahasa yang difahami; dan
- iii. Jangan mengiktikadkan bahawa jampi itu yang memberi kesan sehingga si pesakit itu menjadi sembuh, sebaliknya Allah swt yang berkuasa.
  - a) Tidak boleh mengamalkan bacaan-bacaan tertentu yang tidak difahami maknanya dikuatirinya mengandungi kata-kata pemujaan kepada berhala, iblis, syaitan, atau nama berhala orang kafir serta bercampur aduk dengan ayat Al-Quran.
  - b) Tidak boleh membaca mana-mana ayat Al-Quran secara song sang seperti Qul Huwallah dan lain-lain.
  - c) Tidak boleh menggunakan kitab al-Quran secara tidak wajar menurut syarak seperti menggantung al-Quran dan tunggu berpuasing atau tidak untuk dijadikan alasan tertentu jika pusing begini dan jika tidak bergini pula maksudnya. Semua ini termasuk menghina al-Quran. (Istihza').
  - d) Tidak boleh meninggalkan ibadat-ibadat wajib yang dituntut di dalam Islam seperti sembahyang lima waktu dan berpuasa di bulan ramadhan ketika melakukan amalan perbomohan.
  - e) Tidak boleh menggunakan perbuatan ‘menurun’, memanggil roh orang mati atau sebagainya dalam kaedah perbomohan.

## **10. Bayaran Perkhidmatan/Pengeras**

- i. Sebarang pengeras tidak boleh digunakan dalam perbomohan jika ia dikaitkan dengan untung nasib, buruk atau baik.
- ii. Bayaran perkhidmatan hanya dibolehkan mengikut kesesuaian perubatan dengan tidak terlampau tinggi hingga boleh memberatkan atau menindas dan tidak membawa maksud tolong-menolong.

## **11. Pengijazahan**

Tidak boleh melakukan upacara-upacara yang mengandungi unsur-unsur penyembahan, pemujaan, memohon bantuan atau memperhambakan diri kepada kuasa-kuasa atau tenaga-tenaga ghaib seperti mempersesembahkan sedulang makanan, menyembelih ayam dan sebagainya.

## **12. Tertakluk Kepada Undang-Undang Negara**

Semua pengamal ilmu perbomohan perlu patuh kepada undang-undang negara.

## **PENUTUP**

Dengan mengikut garis panduan ini diharapkan para pengamal ilmu perbomohan dapat menghindarkan diri dari ajaran sesat dan akidah yang karut agar hidup sentiasa dirahmati oleh Allah s.w.t.